

**Nuovi Gòsos di San Giovanni Battista
presentati al Convegno di Senis 2003**

GÒSOS DE SANTU JUBANNE (*Salvatorangelo Chessa, Nuoro*)

Profeta de su Segnore,
l'as preparadu sa via,
Jubanne, novellu Elia,
de Cristos su Precursore.

1. Ses fizu de Zaccaria,
ses fizu de Elisabeta,
de s'Altissimu profeta
pro preparare sa via
a Cristos beru Messia,
de su mundu Sarvadore.

Jubanne...

2. De su Verbu gloriosu
ses boghe forte e potente,
de sa Lughe lampana ardente,
amicu ses de s'Isposu,
martire ses corazosu
de su Zustu defensore.

Jubanne...

3. In disertos penitente,
solu, in pregadoria,
a tie, fizu 'e Zaccaria,
sa Paragula vivente
falat de s'Onnipotente :
ti cunsacrat bandidore.

Jubanne...

4. E cuminzas a zirare
sas terras de su Giordanu,
ti chircat su publicanu,
ti chircat su militare
e sa zente pro imparare
su caminu 'e su Segnore.

Jubanne...

5. «Benide a bos batizare,
e faghide penitenzia,
– jubilabas chin potenzia, –
si bos cherides sarvare,
chi luego at a arribare
su Messia Sarvadore ».

Jubanne...

6. E sa zente ti pediat
comente si cumportare:
una beste debiat dare
chie duas nde teniat.
E cumbertere debiat
sa vida su peccadore.

Jubanne...

7. «De isorvere o ligare
non so dignu sa corria,
Jesus solu est su Messia
chi debides onorare:
Deo debo minimare,
Issu crescere in onore».

Jubanne...

8. «So' mandadu a batizare
solu in abba, in custu logu,
a Santu Ispiridu e fogu
Cristos bos debet sinzare:
su fogu a purificare,
s'Ispiridu Santu Amore ».

Jubanne...

9. Jesus a si batizare
benit cum atera zente,
ma li naras riverente:
« custu non potho azetare!
So deo su 'e sarvare
e tue su Sarvadore ».

Jubanne...

10. «Su zustu e sa veridade,
de cumprire tocat solu».
Lu batizas, ed ecco a bolu
s'Ispiridu 'e santidade,
e su Babbu nat: « Ascurtade
custu fizu 'e tantu amore. »

Jubanne...

11. Cum Jubanne e cum Andria
paris fizis caminande,
lis as mustradu colande
Jesus, su fizu 'e Maria:
s'Anzone 'e Deus - Messia,
de su peccadu bintore.

Jubanne...

12. Fis dae Erode impesonadu,
pro narrer sa veridade:
«Baze e a Jesus dimandade,
– un'imbsciada as mandadu –
si est Issu s'Isetadu,
promintu liberadore» .

Jubanne...

13. Nadelì chi azes bidu
sos malaidos sanados,
sos mortos risuscitados,
– Jesus lis at respondidu –
e già presente e drempidu
s'annu 'e grazzia 'e su Segnore».

Jubanne...

14. E Jesus porrogaiat
sas trumas chi fin inie:
prite in su disertu e a chie
sa zente a bider curriat?
Una canna chi sighiat
su bentu 'e cada sentore?

Jubanne...

15. «Cale profeta est bènnidu,
pius de profeta bos naro:
fizu che a issu declaro
mama non nd'at parturidu.
Ma in su regnu promitidu
de s'urtimu est prus minore ».

Jubanne...

16. Moris martire innozente
pro sos jocos de Palattu,
sa conca in d'unu piattu
una fiza dat che presente
a sa mama impenitente
in d'unu luvadu amore.

Jubanne...

17. O Jubanne una mirada
alcanzanos piedosu
in s'andare dolorosu
de custa vida azotada:
dae tene preparada
siat sa via 'e su Segnore.

Jubanne...

O Santu mereschidore,
in sa vida norte e ghia:
Jubanne, novellu Elia
de Cristos su Precursore.

(*Nuoro, 29 agosto 2003*)

GÒSOS PRO SANTU JUANNI BATTISTA

(Juanni Antiogu Mura, Ilarzi 2003)

In su Tirsu che Jordanu
ses pro s'omine puntiga,
a sos males pone manu
torrandenos Fide antiga.

1. Intro s' ispozu desertu
cun corazzu e cun amore,
a Messia benidore
sas ficcadas as apertu
e donzue ses infertu
cun istima ant postu origa.

a sos males

2. Cussa oghe `e veridade
in su mundu est abarrada;
a nois est arrivada
preigande santidade,
chi sa frassa libertade
no esseret fattu liga.

a sos males

3. Mancari chi su battizu
in s' intragna at raighinas,
sas animas sunt mischinas
mustrant de paghe disizu,
ismengua pena e fastizu
e miseria in artu piga.

a sos males

4. Chircande serenidade
donzi die ti pregamos,
cun fervore dimandamos
de nos dare piedade,
chi totu s'umanidade
apat vida mindiga.

a sos males

5. In su frumene isbaidu
sas abbas chi fint prodizu,
como jughent ludu e pizu,
s'aerzu coloridu,
faghilu torrare nidu
cun sos pisches a pariga.

a sos males

6. Issàlos e ampramanu
sunt bessidos da sa corte,
procurande mala sorte
e anneu fitianu,
Erode ermu metzanu
at lassadu trista istiga.

a sos males

7. Sa pianta e sa malesa
creschida in custa terra
nos ponet in cuntierra,
abacande nobilesa
inzurios e offesa,
trumentana zente amiga.

a sos males

8. Pro torrare a sos arbores
de s'opera `e precursore,
cun su divinu favore
crescant bisados vigores,
sos innotzentes laores
madurent nodida ispiga.

a sos males

9. Sa Sardinna in tribulias
isettat sa manu santa,
ca si tue ses accanta
prapant fogu e tirannias,
a sas malas vizilias
sa bontade fatzat diga.

a sos males

10. Donzi coro sa tristura
licantzet cun sos faeddos,
craros che i sos isteddos
diant anzelica ermosura,
ispricados cun misura
che ispera in terra apriga.

a sos males

In su Tirsu che Giordanu
ses pro s'omine puntiga,
a sos males pone manu
torrandenos Fide antiga.

SANTU ZUANNE BATTISTA
(Giovanni Andrea Migheli, Santulussurgiu 2003)

Za chi de su Redentore
precursore fist'in terra,
azua chi dogni gherra
si trasformet in amore.

1. Za chi dadu as su battizu
a Cristos in su Giordanu
ponebi sa santa manu
pro tzessare ogni fastizu;
de Zaccaria su fizu
faghenos custu favore.

Azua...

2. Cun Elisabetta santa
a betzos su fizu an tentu
e a su cuncepimentu
s'anghelu l'at avisadu
Zuanne l'essen giamadu
de Deus tentu at sonore.

Azua...

3. In su desertu at vividu
bestid' 'e pedd' 'camellu,
e pois abell'abellu
tanta zente at cunvertidu,
e su battizu an retzidu
ca fis bon'unu pastore.

Azua...

4. Tue a dogni occasione
narias semper però:
ma deo nudda non sò
de Cristos a paragone
est issu su campione
de sos benes s'autore.

Azua...

5. Ahi e cantu as penadu
pro Cristos a bonu prou
e pro s'operadu tou
t'iat Cristos laudadu
ca sa zente as preparadu
pro s'arrivu 'e su Signore.

Azua...

6. Ahi e canta pelea
pro Cristos tu'as patidu
sa zente c'as cunvertidu
non nd'amus manch'in bidea
in totu sa Galilea
ti currian a primore.

Azua...

7. Pois Antipa at zuradu
a sa bella Salomè:
app'a cunceder pro tè
cantu tue as disizadu
e issa l'at domandadu
sa conch' 'e su precursore.

Azua...

8. Sa fiza d'Erodiade
tando portare s'at fattu
sa conca in d'unu piattu
cun tanta malvagidade
negh' 'e sa malignidade
de sa mamma, e de rancore.

Azua...

9. Pois de su disaogu
c'at tentu Erodiade;
sa zente de ogni edade
dad'a su cultu s'isfogu:
ti braman in dogni logu
pro insoro protettore.

Azua...

10. Como in su chelu gosende
che ses cun totu sos santos
ma de terra sos ispanos
nessunu l'est olvidende.
Ma tue istes preghende
chi finat gherra e terrore.

Azua...

Za chi de su Redentore
precursore fist'in terra,
azua chi dogni gherra
si trasformet in amore.

(Santutlussurgiu 2003)

GÒCCIOS PRO SANTU JUVANNE
(Pippinu Palimodde, Oliena 2003)

Tue Santu Percussore
lughe 'e s'anima e salute,
a cada animu rude
istrinas das de amore.

1. Juvanne Batista Santu
ses naschidu che anghelu,
de dudas non tenes velu
a Deus jughinde a bantu,
de su Fizzu, nas s'incantu
chi nos benit da su chelu,
pena pro su bonu gelu
li nas a su peccadore.

A cada ...

2. Da minore in soledade
cun sa pena ti derramas,
de santidade sas framas
ti dant bona lighertade,
Tue pro s'umanidade
sa oghe giusta l'iscramas,
negas a su corpus bramas
in su desertu ses frore.

A cada ...

3. Tra sos profettas, profetta
ses arveschidorza istella,
cudda oghe tua bella
est crara, lughida e netta,
oh fizzu d'Elisabetta
de divina parentella,
da sa matessi ghirella
nasches de su Redentore.

A cada ...

4. Novanta dies Maria
in domo tua t'isettat,
a mamma tua secretat
sa divina profezia,
sende mudu Zaccaria
ca sa duda lu prenetat,
cando s'anghelu li ghettat
sa oghe de su Signore.

A cada ...

5. Cand' as tentu naschimenta
Giuanne venis giamadu
ca s'Arcangelu l'at nadu
e de Deus vit s'imprenta,
Elisabetta est cuntenta
Zaccaria at faeddadu,
e at sas dudas lassadu
pro dare a Deus onore.

A cada ...

6. Predichende in su desertu
penitescia e ispera,
sa oghe tua vertera
cumbinchet chi' est incertu,
ca s'andatha l'as apertu
a sa Divina Lumera,
ca connosches sa manera
de s'omine sapidore.

A cada ...

7. Cand'in su riu Giordanu
iffundes su penitente
nd'est batijimu a sa zente
credende in su Soveranu,
nettu che s'aba ses sanu
li nas cunvintu e dolente,
pro cussu cada credente
ti nat su batijadore.

A cada ...

8. Batijende in cussu riu
cun tanta devoscione,
tottus ti dana rejone
t'iscultant a pudoriu,
cand'est su tempus grempiu
batijas una Pessone,
nas a tottus: Billu s'Anzone
chi torrat su mundu a primore.

A cada ...

9. Cun sinnos de umiltade
tanta gloria as connotu,
as amustradu devotu
sa car' 'e sa santidade,
a Issu como mustrade
tottu su ostru arbolottu,
custu est de Deus su votu
ca est mannu e deo minore.

A cada ...

10. Sighis gai a predicare
sa giustiscia divina,
sa tua santa lutrina
tottus cherent iscultare,
ma chi' est in cumandare
ti timet che 'i sa frina,
ca est zente libertina
contr'a Tie ponet pore

A cada ...

11. T'arrestana pro su giustu,
ti ochint pro unu jogu,
dae tando in cada logu
ti pregant cun bonu gustu,
martire rendes vidustu
s'anghelu, Santu de fogu,
ma non morit su retrogu
de su primu predicadore.

A cada ...

12. In su mundu cristianu
gal'oe a Tie pregamos,
grascias ti dimandamos
cand'arribat su veranu,
e miscramos su paganu
ca sos frores ispogiamos,
sos arbores minettamos
misuramos su lentore.

A cada ...

13. Tott'a Tie s'incumandat
cando si brincat su fogu,
b'est de su coro s'atrogu
cando sa ciarra s'abrandat,
sa oghe Tua cumandat
sapidoria in su jogu,
de su Divinu retrogu
galu nos mustras lugore.

A cada ...

Tue Santu Percussore
lughe 'e s'anima e salute,
a cada animu rude
istrinas das de amore.